

QUÆSTIO MEDICA.

*Quodlibetariis disputationibus manè discutienda in Scholis
Medicorum, die Jovis 21^a Januarii 1717.*

M. URBANO LEAULTÉ, Doctore Medico,
Præfide.

An qui fermentationis, ille & hominis naturam nescit ?

I.

QUISQUIS aut scientiæ studio aut Medicinæ operam dedit, humani corporis scientiâ gloriatur. Quidni ? puderet eum videri se ipsum nescire, à quo Naturæ totius cognitio expectatur. Sed quotusquisque eorum est qui præter aut visûs aut tactûs potestatem in eâ re excurrissè cognoscatur ? singularum corporis partium nomina vel merè latina, vel græco detorta fonte magnificè proferuntur ; sua cuique facultas attribuitur, usus assignatur, omnium causa his illisve qualitatibus, primis, secundis, tertiis, occultis accepta refertur. Has inter honos præcipuus habetur calori, qui in capite spiritus animales, vitales in corde, in ore, ventriculo, totâ alvo infimâ naturales præparare, elaborare, perficere perhibetur. O laudem egregiam ! O ampla spolia ! Aut varias opinionum species, velut ægri somnia, sibi in animum induxisse, aut dissectionis labore improbo id unum detexisse, quod vel naturæ rerum imperitissimus assequi possit. Hæc omnia aut non absurda, aut etiam vera sint, quisquis sibi in detegendâ hominis naturâ docti famam comparare volet, progreditur ulterius, & per obstantes scoliorum catervas sua explicans arma, Naturæ sinui se immerget ; ibi, quæ deceat Philosophum, latentem physicam & efficientem omnium humani corporis functionum causam sedulò investigaturus.

I I.

CORPORIS humani fabricam nosse, non superficialiam illam quidem, sed intimam, & cortice vel spississimo obvolutam alicujus pretii nec immeritò haberi debet. Sed quantumlibet in ea quis versatus

oculatusque sit, nihilo φιλοσοφέτερος erit reputandus, dum variarum, quibus continuò exagitur, motionum causam repererit; quam si quis contemnat, rerum quidem sensibus subiectarum haberi poterit eximius explorator, in humanæ verò naturæ scientiâ parùm aut nihil promovisse meritò existimabitur. Hanc ut quis obtineat, ipsa ei Naturæ principia adeunda sunt, non quælibet, sed certa quædam. Eorum triplex ordo potest constitui; omnium prima & simplicissima atomi habeantur, solâ mentis acie perceptibiles; secundum occupent locum quæ resolutionis Chymicæ auxilio detecta sunt: postrema & compositissima terram, aquam, aerem & ignem putato. Primorum contemplatione parùm in inquirendâ hominis naturâ utilitatis percipitur, ut quæ eâ exiguitate prædita sint, quam nulla assequi valeat sensatio vel exquisitissima. Ultima jure etiam contemni possunt, mixtorum naturæ magis quàm principiorum affinia: Te confer ad ea potiùs quæ simplicitatis moderationem habent, spiritum scilicet, sal, sulphur, aquam & terram, in quæ corpora ferè omnia ignis beneficio ultimò resolvuntur. Hæc invicem tenacissimè conglutinata pace altissimâ perfruuntur, datâ verò occasione explicata & sibi permissa pro iis, quas gerunt inter se, inimicitii, & diversis ad motum huc illuc propensionibus, mirum quâ sæpè exagitentur vehementiâ, quas turbas concitent, verbo dicam, fermentationem excitant, primam, præcipuam & efficientem, cùm omnium Naturæ operum, tum etiam humani corporis functionum causam.

I I I.

FERMENTATIONIS naturam, ejusque ad explicanda Naturæ phænomena necessitatem aliundè quàm ab Hippocratis scholâ repetere inane est. Ejus prima origo & remotissima ab atomis; hæc variis ornata figuris, specie determinatis, numero indefinitis, & assiduo concitate motu, coalitu inter se mutuo moles quasdam efformant exiguas, ægrè omninò & rarerè solubiles; ab his invicem conglutinatæ spiritus, sulphur, sal, aqua & terra nascuntur, sensibilia rerum omnium principia. In horum unoquoque seorsim posito nulla unquam perturbatio observatur, ex quibus enim constant molecule homogeneæ sunt, & eandem ad motum propensionem ac determinationem habent. Iis verò simul compositis, præ visu quo à se invicem separari natæ sunt, assiduo eoque diverso, se ipsis interdùm, aliàs fermenti alicujus extrinsecus occurrentis occasione datâ ad motum invitantur. Hic motus fermentatio appellatur. Discrepat ab effervescentiâ; hæc ad solas corporis mixti partes integrantes pertinet, naturam ejus & essentiam non attingit, eamque duntaxat in eo mutationem creat, quæ tactûs aut visûs judicio discerni & explorari possit; illa motus est intestinus principiorum corporis naturalis, quo nexus eorum & ordo immutantur. Si à se invicem omninò dissideant, rem ipsam quam constituunt destrui, aliam oriri necesse est. Si quadantenus duntaxat, ea solùm contingit alteratio, quæ aliter gustum & olfactum quàm antea afficiat. Fermentationem nativo ato-

morum & molecularum ex iis emergentium motui præcipuè adscribendam non mediocriter adjuvat ea salis species, quæ aciditatis sensum excitare nata est; principiis corporis cuiuslibet vel ad motum valdè dispositis, vel jam nonnihil exagitatis immiscens sese, particularum quibus constat acie longè acutissimâ ea tundit, discerpit, & à se invicem contentione non levi discriminat. Calculum ponet quàm optimè, qui fermentationi his fontibus natæ rerum omnium generationem, durationem, interitum tribuerit; hominis quoque, in quo quidquid virtutis corporeæ animadvertitur, aut nesciri, aut à fermentationis motu tantquam causâ primariâ, præcipuâ & efficiente repeti debere agnoscendum est.

I V.

NATURA omnis quanta quanta est, fermentationis in rerum omnium productione vim & potestatem prædicat. Plantarum ei vegetatio, generatio animalium, lapidum, mineralium, metallorum debetur elaboratio. Atque hæc quidem probabile est, ex humido certâ quâdam ratione fermentato, & coaguli salisve cuiusdam fixi interventu concrefcere; Quamobrem veteres quidam Philosophi, inter quos Hippocrates, aquam ceu humidum rerum omnium principium statuerunt. Quòd si ad plantas te convertas, magis res patebit, semen terræ mandatum halitibus ab eâ profectis, & tenuissimâ, mobilissimâque quam sol suppeditat materiâ, interiùs exagitatum emollitur & dehiscit; accedit aqua pluvialis, ut variis salium referta generibus, sic ad movendam fermentationem aptissima. Hinc lobi explicantur, germinis fibrillæ panduntur, radices prodeunt, folia attolluntur. Hæc fermentationi dubitas esse tribuenda? Vide quanta eorum omnium facultas sit ad promovendam vegetationem apud quæ ampla salis volatilis copia observatur. Idem de animalibus existimato; vel homo cæteris longè antecellens, tantulæ rei debet quod nascatur. Muliebre semen ovi naturam præ se ferens quid prodest, nisi virilis accessione fecundetur? quod alio obtineri quam fermentationis nomine cæcus sit qui contendat: Ecquid enim eam in ovo muliebri semen virile non moveat, quod tot venæ, arteriæ, nervi, vasa lymphatica, glandulæ spirituosum, spumofum & fermenti validissimi undequâque insignibus splendidissimis quasi delibutum suppeditant. Hujus itaque impulsu seminis materni particule motu intestino exagitatae, explicant se, tumulantur, tamdiùque dimicant, dum hominis tandem aliqua primùm species priùs latitans expromatur, ab eâdem postmodum, à quâ originem duxit, fermentatione incrementum, ultimamque perfectionem adeptura. Ad hæc qui seriò attenderit, contumax sit, si ignoratâ motûs hujus intestini naturâ ad accuratam humanæ naturæ cognitionem aut pervenisse se contendat, aut speret unquam perventurum.

V.

QUODCUMQUE in humano corpore obitur munus, fermentationis virtute absolvitur; coctiones procurat omnes, liquores quosque nativo caractere exornat, excernit superflua: Ut se habet, vel

naturæ votis consentiens, vel ab iis aberrans, aut sanitatem servat integram, aut morbum accersit, vel sub utroque casu eâdem singularum partium configuratione & structurâ remanente; ut hæc causæ sine quâ stare non possumus, fermentatio efficientis & primariæ merito rationem obtineat. Et certè quid referret ad Chylosum interiorem ventriculi tunicam totuplici glandularum serie esse oppletam; quæ ei incumbit, fibris omnigenis musculorum vices sustinentibus esse intertextam. Venarum, arteriarum, nervorum, vasorum lymphaticorum furculos innumerabiles per totam ejus substantiam dispergi, si cessaret fermentatio, vel perperam & vitiosè obiretur: Quin ipse chylus per venas arteriasque distributus maximè naturam mutaret suam, nisi veterascens cui admiscetur sanguis fermenti ei officium largiretur: Idem esto de reliquis succis huc illuc impulsis judicium. Frustrâ hîc ad calorem nullius apud nos, imò nec alibi uspiam efficaciz confugeris: nisi caloris nomine non nudam, quod plerique tamen ferè omnes faciunt, qualitatem intellexeris; sed materiæ particulas ita & figuratas, & fermentatione exagitatas, ut ad eas adnota manus sensationem experiatur quamdam caloris denominatione vulgo notatam, rei ipsi quæ tangitur ineptissimè attribuas. Has, mihi crede, omitte nãias, his deliramentis abstine. Si veram Philosophi & studiosi Naturæ indagatoris personam sustinere ac defendere velis, consule fermentationem; eâ detectâ Naturam tibi hujus mundi universam atque hominis singularem repræsentabit: nihil te in vegetabilibus, nihil latebit in animalibus, eorum ortûs, durationis, interitûs causas dignosces; putrefactionum omnium, dissolutionum, præcipitationum, coagulationum deteges originem; verbo dicam, hominis quoque natura evadet perspicua, nullâ unquam usquam aliâ ratione penitus detegenda.

Ergo qui fermentationis, ille & hominis naturam nescit.

Domini Doctores disputaturi.

*M. Henricus Besnier, Rei
Herbaria Professor.*

*M. Joan. Bapt. Silva, Se-
renissimi Borbonii Ducis
Medicus ordinarius.*

M. Philippus Caron.

*M. Joannes Bese, Medicus
Domus Regiæ.*

*M. Joannes Bapt. Thomas
Martineng.*

M. Joannes Gelly.

*M. Antonius de Jussieu, è
Regiâ Scientiarum Aca-
demiâ, & Botanices in
Horto Regio Parisiensis
Professor.*

*M. Joan. Henricus Imbert,
è Regiâ Scientiarum
Academiâ.*

*M. Claudius Burlet, Regis
Hispaniarum Medicus
primarius.*

Proponebat Parisiis CLAUDIUS DE LA VIGNE DE FRECHEVILLE,
Parisiinus, Baccalaureus Medicus, A. R. S. H. 1717.
à sextâ ad meridiem.

Typis JACOBI QUILLAU, Universitatis, & Facultatis Medicinæ
Typographi.